



Farqona haqiqati

Ijtimoiy-siyosiy, ma'naviy-ma'rifiy gazeta

<http://farhaqiqat.uz/>

t.me/farhaqiqati

ЁШЛАР КЕЛАЖАК УЧУН ОВОЗ БЕРАДИ

Қувасой шаҳрида Ёшлар сайли ҳамда Конституциявий қонун лойиҳасига бағишланган тарғибот тадбири ўтказилди. Унда ишбилармон тадбиркорлар, фаол депутатлар ва ёшлар сўзга чиқиб, халқ қадр-қимматини ошириш, ёшлар таълим-тарбиясига эътибор қаратиш ҳамда гендер тенглик масалалари бўйича янгиланаётган Конституциямизга киритилаётган ўзгаришлар ҳақида фикр юритдилар, барчани жорий йилнинг 30 апрель куни бўлиб ўтадиган Референдумда фаол иштирок этишга чақирдилар.

– Бугун юртимизда ёшларнинг таълим олишига давлат сиёсати даражасида эътибор қаратилмоқда, – дейди Қувасой шаҳар “Мирзо Улугбек” маҳалла фуқаролар йиғини ёшлар етакчиси Муталлибжон Маматов. – Янгиланаётган Конституциямизда фуқаролар давлат таълим ташкилотларида танлов асосида давлат ҳисобидан олий маълумот олишга ҳақли эканлиги алоҳида белгилаб қўйилгани илм олиш истагида бўлган тенгдошларимизга рағбат беради. Зеро, эртанги кунимизни қўлида китоб тутган зиёли авлод яратади.



“Фарғона ҳақиқати” газетасида босилгандан сўнг

РАСМИЙ МУНОСАБАТга муносабат



3-БЕТ

ВОДИЙ ОВОЗИ




Дала ва коллектор
атрофидан
фойдаланишнинг

Наманган тажрибаси

4-5-БЕТЛАР

Тожикистон Республикаси



Сўғд вилояти



“Ақлли-Бекат”лар

КИМГА ХИЗМАТ ҚИЛЯПТИ?

ТУРКИСТОН МУХТОРИЯТИ

қандай
ўрнатилган
эди?



8-БЕТ

Янгиланаётган Конституция:

Бугунги кунда мамлакатимизда муҳим сиёсий кампанияга пухта тайёргарлик кўрилмақда. Халқимиз "Ўзбекистон Республикаси Конституцияси тўғрисида"ги Ўзбекистон Республикаси Конституциявий қонуни лойиҳасини кенг муҳокама қилмоқда.

Мазкур лойиҳа республикамизнинг ўзига хос жиҳатлари ва хусусиятини муносиб равишда акс эттирадиган, халқаро андозаларга тўлиқ жавоб берадиган, жаҳон тажрибасини, демократия ва энг ривожланган мамлакатлар конституциявий қонунчилиги эришган ютуқларни инobatта олган ҳолда, шунингдек, бевосита халқимизнинг таклифлари асосида тайёрланган бўлиб, бу жараёнда 400 дан ортиқ халқаро ҳужжатлар, 190 га яқин давлат тажрибаси ўрганилган.

Янгиланаётган Конституция моддалари 128 тадан 155 тага кўпайиб, нормалар 275 тадан 434 тага ошган. Унда Ўзбекистон суверен, демократик, ҳуқуқий ва ижтимоий давлат эканлиги ҳамда ушбу қоидаларни ўзгартириш мумкин эмаслиги қайд этилган.

Лойиҳанинг айрим муҳим жиҳатларига тўхталадиган бўлсак, унда камбағалликни қисқартириш, бандликни таъминлаш, ишсизликдан ҳимоя қилиш бўйича янги кафолатлар бел-

ЯНГИ ЎЗБЕКИСТОННИНГ ҲУҚУҚИЙ АСОСИ

гиланмоқда. Шахсни суд қарорисиз 48 соатдан ортиқ ушлаб туриш мумкин эмаслиги, ушлаб туриш чоғида унинг ҳуқуқлари ва ушлаб турилиш асослари унга тушунтирилиши кераклиги ("Миранда қоидалари"), айбланувчи ва судланувчиларга ўзига қарши кўрсатма бермаслик, яъни "суқут сақлаш" ҳуқуқи кафолатланмоқда.

Эндиликда янги ёзишмалар, телефон орқали сўзлашувлар, почта, электрон ва бошқа хабарларни сир сақлаш ҳуқуқи фақат суд қарорига асосан чекланиши мумкин. Инсоннинг шаъни ва қадр-қиммати дахлсиздир ҳамда ҳеч нарса камситиш учун асос бўлиши мумкин эмаслиги назарда тутиляпти.

Таҳрирда ёшлар масаласи алоҳида боб даражасига олиб чиқилиши Янги Ўзбекистонда ёшлар сиёсати устувор эканлигига яққол ишора ҳисобланади. Ўз навбатида, давлат мактабгача таълим-тарбияни ривожлантириш учун шарт-шароитлар яратиши ва бошланғич профессионал таълим бепул эканлиги ҳам белгиланмоқда.

Этиборлиси, мулк дахлсизлиги ва у билан боғлиқ ҳуқуқларнинг таъминланиши давлат томонидан кафолатланади, мулккий ҳуқуқларни чеклаш фақат суд қарори асосида бўлиши мустаҳкамланмоқда. Шунингдек, лойиҳага кўра

давлат атроф-муҳитни яхшилаш, тиклаш ва муҳофаза қилиш, экологик мувозанатни сақлаш бўйича чораларни амалга оширади, фуқароларнинг экологик ҳуқуқларини таъминлаш ва атроф-муҳитга зарарли таъсир кўрсатилишига йўл қўймаслик мақсадида шаҳарсозлик фаолияти соҳасида жамоатчилик назоратини амалга ошириш учун шарт-шароитлар яратади.

Шаҳарларнинг бош режаларини жамоатчилик муҳокамасидан мажбурий ўтказилиши шартлиги белгиланаётганини алоҳида таъкидлаш лозим. Илк маротаба фуқаролик жамияти институтларига бағишланган алоҳида боб киритилиши ва улар фаолияти кафолатларининг белгиланиши жамиятда очиклик, ошқоралик ва қонунийлик муҳитини, давлат ва жамият ўртасидаги мулоқотни мустаҳкамлаш ҳамда кучли жамоатчилик назоратини йўлга қўйиш учун мустаҳкам замин ҳозирлайди.

Янгиланаётган Конституция халқпарвар давлат қуриш мақсадида кучли парламент, ихчам ва масъулиятли ҳукумат, мустақил ва адолатли суд тизимини барпо этишга қаратилган. Қонунчилик палатаси ва Сенатнинг ваколатлари сезиларли даражада кенгаймоқда, икки палата ишидаги

такрорланишлар бартараф этилиб, ҳар бирининг масъулият соҳаси аниқ белгиланади. Хусусан, Қонунчилик палатаси-

нинг мутлақ ваколатлари амалдаги 5 тадан 12 тага, Сенатда эса 14 тадан 18 тага кўпаймоқда.

Жойлардан тенг вакилликни сақлаб қолган ҳолда, сенаторлар сони ҳозирги 100 нафардан 65 нафарга туширилади, бунда ҳар бир ҳудуддан 4 тадан сенатор сайланади, Президент томонидан тайинланадиган сенаторлар сони эса 16 тадан 9 тага камайтиради.

Олий Мажлис палаталарининг бир-галликдаги ваколатлари ҳам кучайтирилиб, парламент назоратининг муҳим шакли бўлган парламент текшируви институти мустаҳкамлаб қўйилмоқда.

Олий Мажлиснинг жамият ҳаётидаги ўрни, роли ва таъсирини кучайтириш мақсадида Ўзбекистон Республикаси Президентининг айрим ваколатлари парламентга ўтказилмоқда.

Суд ҳокимиятининг чинакам мустақиллигини таъминлаш мақсадида Судьялар Олий Кенгашининг барча аъзоларини Сенат томонидан сайлаш тизими киритилмоқда. Фуқароларга суд томонидан ўзига нисбатан қўлланилган қонуннинг Конституцияга мувофиқлиги тўғрисида Конституциявий судга мурожаат қилиш ҳуқуқи берилмоқда.

Бир сўз билан айтганда, янгиланаётган Конституциямиз Янги Ўзбекистон равиши ва ўзбек халқининг фаровон ҳаёти учун мустаҳкам ҳуқуқий асос бўлади.

Жуманазар ЭРГАШЕВ,
Қўқон туманлараро иқтисодий суди раиси.

Фармон ва ижро

ҲАРБИЙЛАР ОНАСИ



Афсуски, уларнинг орасида ҳалок бўлган ҳарбий хизматчи ҳамда ходимлар ҳам бўлди. Уларнинг номларига ҳурмат-эҳтиром кўрсатилиб келинмоқда. Ўзбекистон Республикаси Президентининг "Ватан ҳимояси ва эл-юртимиз тинчлиги йўлида ҳалок бўлган ҳарбий хизматчилар ва ходимлар оила аъзоларини ижтимоий қўллаб-қувватлашни кучайтириш чора-тадбирлари тўғрисида"ги Фармони билан ҳалок бўлган юрт пос-

Мустақилликнинг йўли осон кечмади. Ўзбекистон дунё ҳамжамиятида бугунги ўрни ва обрўсига эришгунча не-не қийин, машаққатли йўллари босиб ўтмади. Ватанни ички ва ташқи душманлардан ҳимоя қилишда юртнинг мард ўғлонлари жасорат кўрсатдилар.

бонлари яқинларига имтиёз ва кафолатлар берилди.

Жумладан, ҳалок бўлган ҳарбий хизматчининг фарзандлари мактабгача таълим муассасаларида бепул тарбияланади, олий ўқув юртларига давлат гранти асосида қўшимча квота орқали қабул қилинади. Ота-оналари темир йўл ва ҳаво йўллари транспортдан йилига икки марта бепул фойдаланадилар. Уларга бепул тиббий ёрдам кафолатланди. Санаторий ва курортларга йилига бир марта бепул йўлланма берилади.

...Марғилонлик Бобуржон Фаниев Сариосий орқали юртимиз чегараларини бузиб кирган босқинчиларга қарши жангда ҳалок бўлган. Фарзанд доғи қанчалар оғир бўлмасин, муштипар она Мунаввар Фаниеванинг қаддини буколмади. Иродаси енгилмас она ўғли Бобуржонни Ватан озодлиги ва мустақиллиги йўлида шаҳид бўлган, деб қабул қилди. Президент Фармони шунинг учун ҳам қаҳрамон онанинг қаддини кўтарди.

– Отаси ҳарбий хизматчи, офицер бўлгани учун ҳар доим қурол ўйинчоқлар ўйнардди, "Онажон мен командир бўламан", дерди, – дейди Мунаввар Фание-



ва. – У доимо "Онажон, биз ўқув машғулотида ёки хизмат юзасидан бирор ёққа кетяпмиз, дуо қиласиз-а", дерди. Ўша кунлари Сурхондарёга кетаётганини айтганди, аммо нимага бораётганини билдирмади. Ўғлимнинг ҳалок бўлгани ҳақидаги хабардан ўзимни йўқотмадим. Ҳар битта инсонга ҳаётида бир марта умр берилади, фарзандим Бобуржон Фаниев ўша бир марталик умрини Ўзбекистон Республикаси халқи учун, Ватани учун фидо қилди.

Мунаввар онанинг хонадони меҳмонлардан аримайди, ҳали ҳокимлик вакиллари, ҳарбийлар, ҳали маҳалладошлари, ўқувчи ёшлар қадам ранжида қилишади. Қаҳрамон ҳарбий хизматчининг онаси уларга ўғли Бобуржоннинг жасорати ҳақида сўзлашни қанда қилмайди.

– Болаларнинг ватанпарвар, меҳнатсевар, чин виждонли бўлиши онага боғлиқ. Болам ана шундай бўлгани, Ватани учун жонини фидо қилгани учун мен бугун ҳарбийлар онаси бўлиб қолдим. Давлатимиз раҳбари биз каби оилаларни қўллаб-қувватлаганларидан миннатдоримиз, – дейди Мунаввар Фаниева.

Муҳаммаджон ОБИДОВ,
ЎЗА.
Элёр ОЛИМОВ олган суратлар.

"Фарғона ҳақиқати" газетасида босилгандан сўнг

"Аёллар дафтари"дан чиқаришнинг
"Фарғонача" усулими?" номли мақола
юзасидан Фарғона тумани ҳокимлиги ва
туман оила ва хотин-қизларни
қўллаб-қувватлаш бўлимининг

РАСМИЙ МУНОСАБАТИ

"Фарғона ҳақиқати" газетасининг жорий йил 9-сонида чоп этилган материалда Фарғона туманида олиб берилган таҳлиллар натижасида кўплаб муаммолар аниқлангани, масъул раҳбар ва мутасаддиларнинг бу борадаги сусткашлиги ҳақида танқидий материал чоп этилган. Мазкур ҳолат бўйича Фарғона тумани ҳокимлиги, оила ва хотин-қизларни қўллаб-қувватлаш бўлими қуйидагиларни маълум қилади:

Мамлакатимиз Президенти ташаббуси билан ташкил этилган "Аёллар дафтари" 3-босқичининг 1-тоифасига, яъни ижтимоий ҳимояга муҳтож ишсиз хотин-қизлардан 2175 нафари рўйхатга олинган бўлса, уларнинг барчаси иш билан таъминланган. 2-тоифага олинган 62 нафар тадбиркорлик қилиш истагида бўлган эҳтиёжманд хотин-қизларга, 3-тоифадаги 1492 нафар боқувчиси бўлмаган эҳтиёжманд хотин-қизларга, 4-тоифадаги 650 нафар ижтимоий ёрдамга муҳтож I ва II гуруҳ ногиронлиги бўлган, шунингдек, тезкор тиббий муолажага муҳтож эҳтиёжманд хотин-қизларга, 3 нафар уй-жойга муҳтож хотин-қизларга, яъни, 513 нафар қарамоғида ногиронлиги бўлган фарзанди мавжуд эҳтиёжманд хотин-қизлар, 6-тоифага тегишли бўлган фуқароларга қонун доирасида кўмак берилганлиги маълум қилинади.

Давлат бюджети маблағларидан базавий ҳисоблаш миқдорининг 4 баробари миқдорида (бир миллион саксон минг сўм), жами 615 миллион сўм миқдорида бир марталик моддий ёрдам кўрсатилган.

Қарамоғида ногирон фарзанди бўлган 4 нафар хотин-қизларга ҳоким ёрдамчилари тавсиялари билан субсидия асосида тикув машиналари ажратилган, 235 нафар

хотин-қизларга эса озиқ-овқат маҳсулотлари берилган.

Бундан ташқари, Республика хотин-қизларни қўллаб-қувватлаш мақсадли жамғармаси маблағлари ҳисобидан 2 нафар хотин-қизларнинг мураккаб жарроҳлик амалиётларини ўтказишлари учун 32 миллион 942 минг сўм пул маблағлари сарфланган. Туман тиббиёт бўлими томонидан 37 нафар "Аёллар дафтари"га киритилган хотин-қизлар бепул дори-дармонлар билан таъминланди. Жумладан, "Хўрабо" маҳалла фуқаролар йиғинида яшовчи фуқаро Рўзихон Нурматовога "Саховат ва кўмак" жамғармаси маблағи ҳисобидан 12 миллион сўм миқдорида моддий ёрдам ҳамда маҳалла фуқаролар йиғини ҳомийлари томонидан 288 миллион сўм миқдорида моддий ёрдам ажратилиб, Ҳиндистон давлатида чуқур жарроҳлик амалиёти ўтказилди.

Бугунги кунда "Аёллар дафтари" орқали кўрсатилган барча кўмаклар хотин-қизларимизни боқимандалик кайфияти учун эмас, балки уларнинг ҳаётда ўз ўрнини топиб олишлари учун кўмак тариқасида жорий этилганлигини унутмаслигимиз керак.

Фарғона тумани оила ва хотин-қизларни қўллаб-қувватлаш бўлими бошлиғи Н.КАРИМОВА.

ТАҲРИРИЯТДАН:

"Фарғона ҳақиқати" газетасининг 2023 йил 3 мартдаги 9-сонида халқ депутатлари Фарғона тумани Кенгаши депутати Назиржон Исақовнинг "Аёллар дафтари"дан чиқаришнинг "Фарғонача" усулими?" сарлавҳали мақоласи чоп этилган бўлиб, унда халқ депутатлари туман Кенгашининг 2022 йил 30 декабрда бўлиб ўтган 66-сессиясида депутатлар сохта ҳужжатларга ишонган ҳолда, туманнинг 4974 нафар хотин-қизларини бир йўла "Аёллар дафтари"дан чиқаришгани танқид остига олинган эди.

Муаллиф мақолада тумандаги бир неча маҳалла фуқаролар йиғини, шу ҳудудлардаги "Аёллар дафтари"га киритилган хотин-қизлар, уларнинг мазкур "дафтар"дан чиқариш сабаблари ва ёлғон маълумотлар бўйича аниқ далилларни келтириб, Ўзбекистон Республикаси Вазирлар Маҳкамасининг 2022 йил 31 мартдаги "Хотин-қизлар муаммоларини ўрганиш ва ҳал этиш тизимини янада такомиллаштириш чора-тадбирлари тўғрисида"ги қарори ва шу қарор билан тасдиқланган "Аёллар дафтари"ни юритиш орқали хотин-қизлар муаммоларини тизимли равишда ҳал этиш ва уларни ижтимоий қўллаб-қувватлаш тартиби тўғрисидаги Низом тартибига зид равишда амалга оширилган "Фарғонача" ижрога муносабат билдирган.

Фарғона тумани ҳокимлиги ва туман оила ва хотин-қизларни қўллаб-қувватлаш бўлимининг юқорида келтирилган Расмий муносабатидан кўриниб турибдики, жиддий масалага юзаки қаралган. Худди хотин-қизларни "Аёллар дафтари"дан чиқариш усули каби. Унда танқид на тан олинган, на раддия билдирилган. Бизнингча, таҳририятга юборилган бу бир варақ матн ўша 66-сессиядаги туман оила ва хотин-қизларни қўллаб-қувватлаш бўлими бошлиғи Н.Каримованинг ахборотидан "парча".

Таҳририят жонкуяр депутатнинг танқидий мақоласини ҳисобот талаб қилиш учун ёритма-ганди, аксинча, бундай қонунбузилиш ҳолатлари билан "дафтар"даги хотин-қизлар тақдирга лоқайдлик бўйича муаммо қўйганди.

Мазкур мақолада келтирилган фактларни жиддий ўрганиб чиқиш ва унга муносабат билдириш бўйича Фарғона вилояти оила ва хотин-қизларни қўллаб-қувватлаш бошқармасига ҳам расмий мурожаат қилинганди. Аммо "Жисмоний ва юридик шахсларнинг мурожаатлари тўғрисида"ги қонунда белгиланган муддат ўтди ҳамки, нуфузли бошқарма сукут сақлашни маъқул кўрмоқда. Балки, далиллар қаршида айтар сўзи йўқдир.

Энг катта иллатлардан бири ана шу лоқайдлигу сукут сақлашда!

ДЕПУТАТ МУАММО ҚЎЯДИ:

"АЁЛЛАР ДАФТАРИ"дан
чиқаришнинг
"Фарғонача"
усулими?



РАСМИЙ МУНОСАБАТга муносабат

Фарғона тумани ҳокимлиги, оила ва хотин-қизларни қўллаб-қувватлаш бўлимининг Расмий муносабати саҳифаланаётган вақтда "Аёллар дафтари"дан чиқаришнинг "Фарғонача" усулими?" сарлавҳали мақола муаллифи, халқ депутатлари Фарғона тумани Кенгаши депутати Назиржон Исақов мазкур жавоб (Расмий муносабатнинг бир нусхаси мақола муаллифига тақдим этилган) бўйича қуйидагиларни тақдим этди:

"Фарғона тумани ҳокимлиги, оила ва хотин-қизларни қўллаб-қувватлаш бўлимининг Расмий муносабатида мақолага раддия сифатида берилган фикрлар, кўрсатилган рақамлар мутлақо нотўғри. Гўё 1, 2, 3, 4-тоифага рўйхатга олинган хотин-қизларнинг ҳамма муаммолари ҳал этилибди?! Базавий ҳисоблаш миқдорининг 4 баравари миқдорида, жами 615 миллион 600 минг сўм миқдорида бир марталик ёрдам берилибди!

Агар шу маълумотлар рост бўлса, ўша фуқароларнинг исм-фамилияси, манзили, кўрсатилган ёрдам тури, уларнинг доимий даромад манбаига эга бўлиб, яшаш шароитлари яхшилангани ҳақида маълумотлар, уларнинг ҳар бирига тўлдирилган индивидуал дастурлар "йўл харита"лари ҳам бормиди, агар бўлса нега тақдим қилинмади?!

Мақолада бундай ҳужжатлар тузилмагани, агар тузилган бўлса, улар ҳақиқий ҳолатга тўғри келмаслиги, сохталаштирилгани, кўзбўямачилик, хўжақўрсинга тузилгани танқид қилинган эди.

Расмий муносабатда бу фикрларимизни инкор қиладиган бирорта факт йўқ. Рақамлар холос.

Ваколатли органлар бу рақамларни бирма-бир ўрганиб, "Аёллар дафтари"дан чиқарилган 4974 нафар хотин-қизлар билан суҳбат ўтказиб, уларнинг ижтимоий ҳолати, яшаш шароитлари бўйича ҳақиқий ҳолатларни аниқлаб, қонунчиликка биноан якуний ҳулосага келишлари керак.

Муносабатда Рўзихон Нурматовога қарийб 300,0 миллион сўм ёрдам кўрсатилгани баён қилинган, лекин бу ҳам нотўғри. Маҳалла фаоллари томонидан 2022 йил 18 июлда тузилган далолатномада яхши инсонлар кўмаги ва ёрдами орқали 15000 АҚШ доллари миқдорида маблағ йиғилиб, бемор Ҳиндистон давлатига жарроҳлик амалиёти учун юборилгани ёзилган (далолатнома илова қилинади). Шу билан бирга, халқ депутатлари туман Кенгашининг депутатлари ташаббуси билан Рўзихон Нурматовога "Саховат ва кўмак" жамғармаси маблағлари ҳисобидан 12 миллион сўм маблағ ажратилган, айнан депутатларнинг ташаббуси билан.

Н.ИСАҚОВ,
халқ депутатлари Фарғона туман Кенгаши депутати".

№1

ВОДИЙ

Фарғона водийси Марказий Осиёдаги тоғлар билан ўралган, майдони тахминан 22 минг километр-квадратни ташкил этадиган мафтункор, хушманзара, табиати бошқа экологик минтақалардан ажралиб турадиган ҳудуд. Водий таркибига Ўзбекистоннинг Фарғона, Андижон, Наманган вилоятлари, шунингдек, Тожикистон Республикасининг Сўғд, Қирғизистон Республикасининг Ўш, Баткен, Жалолобод вилоятлари киради.

Бугунги кунда мамлакатимизда бўлгани каби қўшни республикаларда кенг ислохотлар жараёни кечмоқда, катта ҳажмдаги қурилиш, ободонлаштириш ишлари амалга оширилмоқда. Иқтисодий кўрсаткичлар салмоғи, қардош халқлар турмуш фаровонлиги ошиб бормоқда. "Фарғона ҳақиқати" газетаси таҳририяти водий вилоятларида кечаётган шундай янгиланишлар, ютуқ-юксалишлар жараёни билан вилоятимиз халқини таништириб бориш мақсадида "Водий овози" саҳифасини ташкил этди.



Дала ва коллектор атрофидан фойдаланишнинг Наманган тажрибаси

Наманган вилоятида бу борада муайян тажриба бор эди. Сўнги таклиф ва берилган имконият уни янада ривожлантиришга шароит яратди. Ҳисоб-китобларга қараганда, биргина Тўрақўрғон туманида агар зовур ва коллекторлардан қазиб чиқарилган тупроқ тепаликлари текисланса, озиқ-овқат экинлари экиш ва тутзор яратиш учун 250 гектар қўшимча ер майдони пайдо бўлар экан.

– Тўрақўрғон туманида 256 километр закон-зовурлар бўлиб, ҳозиргача 10 километридаги муҳофаза зонасидан фойдаланиб келар эдик, – дейди туман ирригация бўлими бошлиғи Илҳомжон Абдуллаев. – Президент селекторида шахсан ўзим қатнашдим. Бугунда-ноқ биз техникаларни жалб этган ҳолда рашаларни текислатиб, шу ерга яқин аҳолига 10-15 сотихдан шартнома асосида бўлиб беряпмиз.

Туманнинг "Шаханд" қишлоқ фуқаролар йиғини ҳудудидаги коллектор қирғоқларида сургич техникалар иш бошлаган. Тозаланган зовур қирғоқлари янги эгаларини топмоқда.

– Бу ерлар зовурдан чиққан тупроқли дўнглик эди. Президентимиз ташаббусларига кўра, туман мутасаддилари келиб, бизни чақиринди, кўринглар, рўзғорбоп маҳсулот етиштиринглар, дедилар. Менга ҳам 6 сотих жой тегди, – дейди ер эгаси бўлган Комилжон Бозоров. – Зовурдан чиқарилган, дам олиб ётган тупроқ унумдор бўлади. Картошка эймоқчиман. Бу менинг оиламга ёрдам бўлади,

Ўтган ҳафтада Президент Шавкат Мирзиёев раҳбарлигида озиқ-овқат маҳсулотларини кўпайтириш, баҳорги экин мавсумини самарали ташкил этиш чора-тадбирлари юзасидан видеоселектор йиғилиши бўлиб ўтган эди. Унда, жумладан, дала ва коллектор – дренажлар атрофидаги ерлар аниқланиб, фермер хўжалиги ишчиларига, эҳтиёжманд аҳолига ижарага бериш муҳимлиги айtilди.

худо хоҳласа.

Тажрибали деҳқонлар коллектор тупроғидан ўғит сифатида фойдаланганлар. Шунинг учун текисланаётган тўйинган тупроқли ерларга фермерларнинг ўзлари "харидор" бўлишмоқда.

– Закон-зовурлар бўлидаги фермер хўжаликларимиз ҳам тут плантацияси қилишмоқчи, ошқовоқ экишмоқчи. Биз уларга дўнгликларни текислаб ёрдам беряпмиз, – дейди Илҳомжон Абдуллаев.

Биз атайин Тўрақўрғон туманининг энг чет "Забардаст Файрат" ҳудудида бўлдик. Қир-адирлар этагида ҳам деҳқончиликнинг барча талаблари бажарилган. Ғалла кўчатлари тўқ ва дуркун. Чигит экиш ишлари давом этяпти. Дала четлари эътиборимизни тортди. Ҳар бир ер майдони айланасига тут кўчати экилган. Келгуси йилдан пиллачилик учун озуқа бера бошлайди.

– Ҳудудимизда 6 та пахта-ғаллачилик фермер хўжалиги бўлиб, дала четларига 19 минг туп тут кўчатлари ҳамда 5 мингта мевали кўчат экиб парваришляпмиз, – дейди ҳудуд раҳбари Маҳмуджон Умаров. – Ундан ташқари, кластер томонидан дала четларига ошқовоқ, картошка уруғлари олиб келиб берилляпти. Селектордан ке-

йин яна 10-12 минг тут кўчатлари олиб келиб бериладиган бўлди.

Шу ҳудуддаги "Янгиобод зарзийнати" фермер хўжалиги дала шийпониди мўъжазгина товўқхона ҳам бор экан.

– 6 ойлик имтиёзи билан кредит асосида 400 бош парранда олганмиз, улар ҳар куни 180-200 тадан тухум беради. Бир қисмини дала иссиқ овқатига ишлатамиз. Қолганини маҳалла дўконига топширамиз, – дейди фермер Зайниддин Тиллабоев. – Ҳудудимизда 60 та яшиқда асалари боқяпмиз. Унинг даромади ҳам фермер хўжалигимизга кирим қилинади. Бундан ташқари, 8 бош қорамолимиз ҳам бор.

Ҳа, фермер Зайниддин Тиллабоев пахта, ғалла етиштириш билан бирга, озиқ-овқат таъминотига имкон топиб ҳисса қўшмоқда. Гўшт, сут, тухум, асал... Ахир, ўзингдан чиққанига нима етсин.

Президент селекторидан сўнг янги имтиёзлар пайдо бўлди. Зайниддин ва у каби кўплаб наманганлик фермерлар ҳамда эҳтиёжманд оилалар бундай имкониятдан самарали фойдаланмоқчилар.

**Муҳаммаджон ОБИДОВ.
Элёр ОЛИМОВ олган
сурат.**

Экспортбоп маҳсулотлар турини ошириш – асосий мақсад

Наманган вилоятидаги "Art soft xolding" масъулияти чекланган жамияти таркибида пахтачилик ва ғаллачилик, тўқув, тикув-трикотаж, кафель ва керамика, чинни ҳамда фарфор, қурилиш материаллари ишлаб чиқариш фаолияти билан шуғулланувчи 27 та корхона фаолият кўрсатмоқда. Уларда 5,5 мингдан зиёд киши бандлиги таъминланган.

Айтиш керакки, ушбу йирик қувватнинг тўқув, тикув-трикотаж, қурилиш ва бошқа турдаги тайёр маҳсулотлари Германия, Италия, Польша, Хитой, Туркия, Покистон, Болгария, Молдова, Литва, Латвия каби давлатларга экспорт қилинмоқда.

Корхонада экспортбоп маҳсулотлар турини ошириш устида истиқболли лойиҳалар давом эттирилмоқда.



Тожикистон Республикаси СЎҒД ВИЛОЯТИ

ТАДБИРКОРЛИКДА ЯНГИ ЙЎНАЛИШ

Мамлакатимиз ҳукумати тадбиркорликни ривожлантириш мақсадида зарурий чора-тадбирларни амалга ошириб келмоқда. Албатта, бунинг замида аҳолининг фаровон турмушини таъмин этиш масаласи илгари сурилган. Шунингдек, тадбиркорлик билан шуғулланувчи шахслар учун кенг имконият яратилганлиги қувонарли ҳолдир. Сўғд вилоятида бу масалага алоҳида эътибор қаратилган бўлиб, вилоят раиси Ражаббой Аҳмадзода барча шаҳар ва ноҳияларга сафарларида тадбиркорлар билан учрашиб, уларнинг эзгу бошламалари ибрат намунаси эканлигини алоҳида қайд этмоқда.

Бугун бозорларимизни тўлдириб турган ноз-неъматларда ва турли халқ эҳтиёжи маҳсулотларида шундай тадбиркорларнинг ҳиссаси яққол намоён бўлмоқда. Шунингдек, давлатимизнинг ҳар қарич



ВИЛОЯТ РАИСИ "ЗАРАФШОН" ҚЎШМА КОРХОНАСИДА

Сўғд вилояти раиси Ражаббой Аҳмадзода Панжакент шаҳридаги "Зарафшон" қўшма корхонаси фаолияти билан танишди.


Тинчлик ва миллий бирлик асосчиси – Миллат пешвоси, Тожикистон Республикаси Президенти, муҳтарам Эмомали Раҳмоннинг қўллаб-қувватлаши билан корхона фаолияти янада кенгайтирилиб, айти пайтда 120 миллион АҚШ доллари эвазига мис ишлаб чиқариш объекти бунёд этилмоқдаки, у ишга туширилиши билан 200 та янги иш ўрни яратилади.

Вилоят раиси корхонанинг ишлаб чиқариш ҳажмини ошириш, лицензия муддатини узайтириш, атроф-муҳит хавфсизлигини таъминлашга алоҳида эътибор қаратди. Шу билан бирга, қурилиш ишларини белгиланган муддатда яқунлаш, корхона ҳудудини ободонлаштириш, ижтимоий соҳа иншоотларини бунёд этиш юзасидан мутасаддиларга аниқ топшириқлар берди.

"Зарафшон" қўшма корхонаси Тожикистондаги маъданни қайта ишловчи йирик объект ҳисобланади. Мазкур корхонанинг мамлакат sanoati ишлаб чиқаришининг умумий ҳажмидаги ҳиссаси салмоқли бўлиб, унинг маблағлари ҳисобидан вилоятда турли ижтимоий иншоотлар ҳам барпо этилмоқда.

еридан оқилона фойдаланиб, унумли ҳосилни қўлга киритиш тўғрисидаги сиёсатига амал қилган вилоят миришкорлари йилнинг ўн икки ойида ҳам бозорларимизни сифатли маҳсулотлар билан таъмин этмоқда.

Панжакент шаҳрининг "Саразм" қишлоқ жамоати Шернова қишлоғида туғилган Худойназар Аъзамовнинг асли касби ўқитувчиликдир. У узок йиллар келажак авлодга таълим-тарбия берди. Шу билан бирга, тадбиркорлик билан ҳам шуғулланади. Айти пайтда Худойназар ака турмуш ўртоғи Раҳуза Аллаёрова билан Хўжанд шаҳрида истиқомат қилмоқда. Яқинда унинг қўзиқорин етиштираётганини эшитиб, у киши билан



ҚўКАЛАМЗОРЛАШТИРИШ АВЖИДА

Сўғд вилоятининг барча шаҳар ва ноҳияларида баҳор фаслининг кириб келиши билан ободонлаштириш ва қўқаламзорлаштириш ишлари жадал бормоқда.

Хўжанд шаҳар қўқаламзорлаштириш ташкилоти ходимлари шаҳар ҳудуди ва уч микроноҳияда хайрли ва савобли ишларни бажаришмоқда. Бу ишларга шаҳардаги корхона, ташкилот, давлат таълим ва тиббиёт муассасалари ходимлари ҳам ҳисса қўшиб, хиёбонлар, йўл бўйлари, ички ҳудудларига турли манзарали дарахтлар ва гуллар ўтқазилди.

Хўжанд шаҳар қўқаламзорлаштириш ташкилоти раиси ўринбосари Абдуворис Мираминовнинг айтишича, шаҳар минтақасига 250 мингта лола пиёзи, сальвия (маржонгул), икки турдаги тагес, 350 мингта петуния, 22 минг туп атиргул, 170 туп можевельник (ордач), 50 туп катальпа, 95 туп сосна (санавбар), 85 туп кипарис ва бошқа мавсумий гуллар, манзарали дарахтлар кўчатлари ўтқазилди.

– Бу йилги кишининг қаҳратони туфайли иссиқхонамиздаги гуллар, дарахтлар ниҳоллари қуриб қолди. Шундай бўлса-да, қайта уруғ қадаб, етарли кўчатларни етиштириб олдик. Кўча-кўйлардаги гулларнинг очилиб турганига кўзимиз тушганда, меҳнатларимиз роҳатини кўргандай бўламиз, – дейди ташкилот бош агрономи Эргашой Гадоёбоева.

Турсуной ДЎСМАТОВА.

учрашишга келишдик.

Олдинлари қўзиқорин йилнинг фақатгина баҳор ойларида табиий ҳолатда тоғу қир-адирларда униб чиққан бўлса, эндиликда уни кишининг чилласида ҳам савдо шохобчалари ва бозорлардан топиш мушкул эмас.

Мутахассисларнинг қайд этишича, қўзиқорин инсон организми учун ўта фойдали ҳисобланиб, айниқса, юрак-

қон томир касалликларига чалиниш ва тез қаришнинг олдини олиш, суяклар ва хотирани мустаҳкамлаш, иммунитетни мустаҳкамлашда муҳим аҳамият касб этади.

Худойназар Аъзамов турган манзилга етиб боргач, у киши бизни қўзиқорин етиштираётган махсус хонага бошлади. Бир текис ривожланаётган қўзиқоринларни кўздан кечирар эканмиз, унинг қандай қилиб етиштирилаётгани билан қизиқдик.

– Бир неча йил олдин ижтимоий



ДЎСТЛИК ТАДБИРЛАРИ

Тожиқ ва ўзбек халқлари ўртасидаги ўзаро ҳурмат ва яхши қўшничиликка асосланган алоқаларни мустаҳкамлашда ҳамкорликдаги икки томонлама манфаатли тадбирларнинг ўрни катта.

Яқинда Ўзбекистон Республикасидаги "Ватандошлар" жамоат фонди бошқаруви раиси Одилжон Сатторов, "Ўзбекистон адабиёти ва санъати" газетаси масъул ходими, шоир ва таржимон Ҳумоюнбек Акбаров, "Ёшлик" журнали бош муҳаррири, Ўзбекистон Республикаси Ёзувчилар уюшмаси аъзоси Нурулло Чори Хўжанд шаҳрига ташриф буюриб, бир қатор маънавий-маърифий тадбирларда иштирок этдилар.

Меҳмонлар дастлаб вилоят давлат ҳокимияти ижроия органи наشري – "Сўғд ҳақиқати" газетаси таҳририятида бўлиб, "Сўғд ҳақиқати" газетаси бош муҳаррири Фарҳод Жўраев раҳбарлигидаги ижодий жамоа фаолияти билан танишдилар. Сўнгра таҳририят қошида очилган вилоят Ўзбеклар жамияти кутубхонасининг очилиш маросимида қатнашдилар. "Ватандошлар" жамоат фонди томонидан кутубхонага ўзбек ёзувчи ва шоирларининг 100 дан

тармоқлар орқали Ўзбекистонда тадбиркорлар қўзиқорин етиштираётганларини кўрдим ва Хўжанд шаҳрида ҳам буни амалга ошириш мумкинлигини билдим. Интернетдан замбуруғ ҳақидаги барча маълумотларни ўрганиб чиқдим. Лекин дилимда қўшни республикага бориб, қўзиқорин етиштириш ҳолатини ўз кўзим билан кўриб, агротехник тадбирларини ўрганиб келиш истаги пайдо бўлди.

Фарғона вилоятига бориб, қўзиқорин етиштираётган тадбиркор Абдуллажон билан учрашдим, ундан тажриба ўргандим. Қўзиқорин уруғидан беришди. Хўжандга қайтгач, бу ишни амалга оширишга киришдик. Олдимга қўйган мақсад мени ҳаммиса ишонч сари ундаб турди. Турмуш ўртоғим, фарзандларим Хурсонмурод ва Ҳуриятхон ёрдам беришди. Мана, кўриб турганингиздек, бошланғич натижалар

ёмон эмас.

Етиштирилган ҳосилни бозорга олиб бориб сотаяпман, – дейди Худойназар Аъзамов.

Тадбиркорнинг ниятлари катта, келажакда фаолиятини янада кенгайтириб, вилоятимизнинг барча шаҳар ва ноҳияларида қўзиқорин етиштиришни йўлга қўйиш ва шунинг баробарида, қўшимча иш жойлари ҳам яратишдир.

Облоқул МЎСОЕВ.



ортиқ бадий китоблари совға қилинди, жойларда ижодий учрашувлар, дўстона тадбирлар бўлиб ўтди.

Шунингдек, Наврўз байрами арафасида Ўзбекистон Республикасининг Тожикистон Республикасидаги элчихонаси ва "Ватандошлар" жамоат фонди ташаббуси билан Хўжанд шаҳридаги "Темурмалик" маданият мажмуасида улуг айёмга бағишланган адабий-бадий кеча ташкил этилди. Унда жамоат фонди матбуот котиби Уфора Ҳабибуллаева бошчилигида қўшни давлатдан ташриф буюрган санъаткорлар Дилафрўз Ҳайитметова, Жамбул Муҳаммедов, Изроҳат Муродова ҳамда Сўғд вилоятининг Тожикистон Ниязова, Абдумуталиб Норматов каби эстрада хонандалари, таниқли шоир ва ёзувчилари қатнашиб, яхши қўшничилик, дўстлик-биродарлик аъналарини мадҳ этдилар, икки тилда қўшиқ куйлаб, шеър айтиб, иштирокчиларга маънавий озук улашдилар.

Фарангиз БАҲОДУРЗОДА.
(Саҳифа "Сўғд ҳақиқати" газетаси ижодий ходимлари билан ҳамкорликда тайёрланди).

Мутасаддилар эътиборига:

Иссиқ кунлар бошланяпти. Йўлларда қўлини пешонасига қўйган кўйи, жамоат транспортини кутаётган йўловчилар сони анчайин кўпайиб қолди. Шундай паллаларда автобус бекатлари киши жонига оро киради. Шу ўринда, кейинги йилларда вилоятимиздаги аксарият бекатларнинг замонавий қиёфа касб этгани юрдошларимизни қувонтираётганини айтиб ўтиш жоиз.

“Ақлли бекат”лар

КИМГА ХИЗМАТ ҚИЛЯПТИ?

Фарғона вилояти ҳокимлиги ташаббуси билан вилоят шаҳар-туманларида “Ақлли бекат” тизими шакллантириляётгани йўл инфратузилмасини яхшилаш, аҳолига қулай шароитлар яратишда муҳим омил бўлиб хизмат қилмоқда. Қисқа вақт ичида ташаббускор тадбиркорлар томонидан бўш турган, қаровсиз ёки маънан эскирган автобекатлар “Ақлли бекат” лойиҳаси асосида янгитдан қурилди, кўркам ва замонавий қиёфа касб этди. Атрофлари ободонлаштирилди, ҳудудлар чиройига чирой қўшди.

Бироқ ҳамма “Ақлли бекат”нинг “ақли” расо дея олмаймиз. Бу фикр-ни биз ўрганган бекатлар мисолида айтяпмиз. Чунки кўрганларимиз бундай масканлар йўловчиларга эмас, кўпроқ тадбиркорлар манфаатига хизмат қиляётгандай.

Фарғона шаҳрида бугунги кунда 120 дан ортик “Ақлли бекат” фаолияти йўлга қўйилган. Уларнинг аксарияти савдо-сотик, энгил умумий овқатла-ниш хизматиға мослаштирилган. Бизни ажаблантиргани шуки, айрим бекатларда йўловчилар учун ҳеч қандай шароит йўқ, қайтанга, жамоат транспортини кутувчи фуқаролар серкатнов йўл бўйларига чиқиб, автобус кутишларига тўғри келяпти.

Юксалиш кўчасида жойлашган “Ақлли бекат” дамиз. Унинг асосий қисми савдо шохобчасидан иборат. Сотувчи Равшан Қосимовнинг айтишича, “объект” ўғли Темур Қосимовга тегишли экан.

Фарғона шаҳри маркази ва кўп аҳоли истиқомат қиладиган Абдулла Қодирий мавзеини боғлайдиган бу кўчада автотранспортлар ҳамиша тирбанд. Автобуслардан ташқари, такси, “Дамас”

енгил машиналари йўловчи ташийд. Шундай гавжум кўчадаги мазкур “Ақлли бекат”нинг йўловчилар учун ажратилган қисмида бир неча ўриндик ва электр розеткасидан бошқа ҳеч нарса йўқ. Белгиланган техник шартларга риоя қилинмаган. Ҳатто атрофи ойна билан ўралмаган. Холатни кўриб, “Ақлли бекат”нинг номига муносиб эмаслиги бўйича эътироз билдирганимизда, фаолият бошлаганларига эндигина бир ой бўлганини ваз қилди Равшан Қосимов. Йўлнинг қарама-қарши тарафидаги бекат эшиклари соат 10:00 бўляптики, очилгани йўқ. Ҳолбуки, жамоат транспортлари соат 06:00 дан қатнов-ни амалга оширади. Бу ер ҳам савдо шохобчаси сифатида мослаштирилган, бироқ уddaбурон тадбиркор бекатнинг йўловчиларга ажратилган қисмидан омборхона ўрнида фойдаланаётганга

ўхшайди. Чунки ойнаванд тўсигидан кўришиб турибдики, унинг ичи салқин ичимликлар, музлатгич ва супермаркет саватчалари билан тўлдирилган. Йўловчи учун оёқ қўядиган жойнинг ўзи йўқ.

Аслида инновацион жамоат транспорт бекатларини ташкил қилишнинг бир неча муҳим тартиби бор. Жумладан, қулай ўриндиклар, жамоат транспорт ҳаракат жадвали, чиқинди қутиси, фавқулодда алоқа ахборот панели, бепул Wi-Fi интернет, видео назорат, USB электр тармоғи бўлиши шарт. Бундан ташқари, об-ҳаво шароитидан келиб чиққан ҳолда, йўловчиларни ёзда иссиқдан, қишда эса совуқдан ҳимоя қилиш учун кондиционер ўрнатилиши лозим.

Университет кўчасидаги “Само” спорт мажмуаси ва “Водий” тўйхонаси ёнида иккита “Ақлли бекат” жойлашган бўлиб,


улар ҳам йўловчилардан кўра, эгалари фойдасига хизмат қиляётгани яққол кўзга ташланиб турибди. Бекатнинг кутиш қисми товарлар, савдо жиҳозлари билан лиқ тўла. Тадбиркорлар “Ақлли бекат” лойиҳаси бўйича белгиланган талаблар асосида йўловчиларга шароит яратилмагани бўйича сўровимизга тайинли жавоб бера олишмади. Улардан бири аввал бекатга кондиционер, телевизор қўйилгани, лекин уларни ўғирлаб кетмасликлари учун эҳтиёт чораси сифатида олиб қўйишганини рўқач қилди. Аммо у бекат видеокамера назоратида эканлигини унутди чоғи.

Қувасой кўчасида жойлашган “Ақлли бекат”лар ҳам тадбиркорларнинг махсуслотлари билан банд. “New York” номли fast food тайёрланадиган масканнинг бекат қисми мижозлар тамаддиҳонасига айлантирилган.

– Биз Алишер Навоий кўчасида яшаймиз. Дастлаб, замонавий бекатлар фаолиятидан жуда хурсанд бўлгандик. Мана шу жойда китоб савдоси ҳам ташкил этилганди. Жамоат транспорт кутаётган йўловчиларнинг китоб варақлаётганини кўп бора кўрганман. Ҳозир фақат жавонларнинг ўрни бор холос, китоблар йўқ. Кўриб турганингиздек бекатимиз қаровсиз ҳолга келиб қолди, – дейди Гулчирай Иброҳимова.

Ниятимиз эзгу, вилоятнинг ҳар бир шаҳар-туманида ташкил этиляётган “Ақлли бекат”лар лойиҳа талабларига мос равишда жиҳозланса, айрим тадбиркорлар томонидан йўл қўйилаётган камчиликлар ўрганиб чиқилиб, муаммолар бартараф этилса эди, йўловчиларга қулай шароитлар яратилган бўларди. Лойиҳадан кўзланган мақсад ҳам шу!

Гўзал ОХУНОВА.





Рамазон сабоғи



Раҳматуллоҳ ЖАЛИЛОВ,
Марғилон шаҳар "Саҳоба
Зайд ибн Ҳориса" масжиди
имом-хатиби

Айни кунларда Рамазон шукуҳи қалбларга илиқлик ва сокинлик улашмоқда. Бу ойнинг аввали раҳмат, ўртаси мағфират ва охириги ўн кун дўзахдан озод бўлиш фурсатидир. Ушбу дамларда муборак ойнинг раҳмат даҳаси ҳам яқун топмоқда. Илоҳо, барчамизни ўз раҳматида дохил қилсин!

Бошқа пайтларда ҳам, қолаверса, мана шундай улғун кунларда динимиз эътибор қаратган амаллардан бири – силаи раҳмдир!

"Силаи раҳм" сўзини она тилимизга сўзма-сўз ўгирадиган бўлсак, "раҳмни боғлаш" деган маъно келиб чиқади. Раҳм эса қариндош дегани, она бачадонини ҳам араблар "раҳм" дейдилар. Демак, силаи раҳм деганда қариндош-уруғлар билан яхши алоқада бўлиш, уларнинг ҳолидан хабар олиш ҳамда моддий ва маънавий жиҳатлардан қўллаб-қувватлаш кабилар тушунилади.

Қуръони каримнинг бир қанча оятларида қариндошлик алоқаларини боғлашнинг фазилати ва уни узишнинг ёмонлиги ҳақида сўз юритилган. Жумладан, қуйидаги оятда қариндошликни боғлайдиган кишилар мақталади: "Улар Аллоҳ боғланишга буюрган нарсаларни (яъни, қариндошлар билан алоқани) боғлайдилар, Парвардигорларидан кўрақадилар ва (охиратда) ҳисоб-китобнинг нохуш кечидан қўчийдилар" (Раъд сураси, 21-оят).

Пайғамбаримиз соллаллоҳу алайҳи васаллам ҳам бу мавзу жуда муҳимлигини ҳадиси шарифларида таъкидлайдилар: "...ва ким Аллоҳга ва охира кунига имон келтирган бўлса, қариндошлик алоқаларини боғласин..." (Имом Бухорий ва Имом Муслим Абу Ҳурайрандан ривоят қилинган).

Анас ибн Моликдан ривоят қилинган ҳадиси шарифда эса силаи раҳм сабабли ризқнинг мўл-кўл, умрнинг узок бўлиши уқтирилади: "Ким ризқи кенг бўлиши, умри узун бўлишини хуш кўрса, қариндошлик алоқаларини боғласин" (Имом Бухорий ва Имом Муслим ривоят қилишган).

Демак, қариндошлар билан гўзал муомалада алоқани ушлаб туришлик, умр узайишининг, ризқ мўл бўлишининг сабабчиларидан экан. Умри узайишини хоҳлаган одам қариндошларига яхшилик қилсин, ризқи кенг бўлишини, топган-тутганига барака киришини истаган одам қариндошлари билан борди-келди қилсин!

Бугунги кунимизда қариндош-уруғлар билан алоқада бўлиб туришнинг минг бир хил йўллари, минг бир хил воситалари мавжуд. Авваллари одамлар узокроқда яшайдиган биронта қариндошиникига бориш учун от-араваларда соатлаб, балки кунлаб юрган бўлса-

СИЛАИ РАҲМ МУСУЛМОН КИШИГА ФАРЗ БЎЛГАН АМАЛДИР

лар, ҳозир, алҳамдулиллаҳ шаҳарни у четидан бу четига машинада фир этиб, санокли дақиқаларда етиб олиш мумкин. Бугун қариндошлар билан алоқа қилмаслик учун биронта ҳам баҳона қолмаган. Ҳеч бўлмаганда автобус, йўналиш ва йўналишсиз таксилар каби умумий нақлиёт воситаларига миниб бўлса ҳам узокни яқин қилиш мумкин.

Силаи раҳмни мустаҳкамлашда қуйидаги яхшилик бор:

- силаи раҳм қилган киши Аллоҳнинг муҳаббатини қўлга киритади;
- силаи раҳм қилган кишининг умри узок бўлади;
- силаи раҳм қилган кишининг ризқига барака киради;
- силаи раҳм қилган кишига Аллоҳ таоло яхшилик ато қилади;
- силаи раҳм қилган кишини халқ яхши кўради;
- силаи раҳм қилган кишига ҳар жойда дўст ва хайрихоҳ кўпаяди;
- силаи раҳм қилган кишининг вафот этганидан кейин ҳам орқасидан савоб боради.

Силаи раҳмнинг акси, зиддини "қотиъур-раҳм", яъни "меҳр риштасини узишлик" дейилади. Динда қотиъур-раҳм, қариндошлик алоқаларини узиш қаттиқ қораланади.

Абу Ҳурайра (розияллоҳу анху)дан ривоят қилинган ҳадисда келишича, бир киши Набий (соллаллоҳу алайҳи васаллам) ҳузурларига келиб:

– Ё Расулulloҳ, менин шундай қариндошларим борки, мен улар билан алоқа қиламан, улар эса мен билан алоқани узидилар, мен уларга яхшилик қиламан, улар эса менга ёмонлик қайтардилар, улар менга жоҳиллик қиладилар, мен эса уларга ҳалимлик, юмшоқлик қиламан, – дея нодон қариндошларидан шикоят қилди. Шунда Набий (соллаллоҳу алайҳи васаллам) шундай дедилар:

– Агар иш сен айтгандек бўлса, унда билгинки, сен уларга қайноқ чўғни едираётган экансан (яъни, хафа бўлма, сен улардан мағлуб эмас, балки ғолиб бўлаяпсан). Зоҳирдан улар сенга зулм ўтказаяптилару, аммо ютқазмоқдалар. Модомики, сен улар билан шундай муомалада экансан, доимо Аллоҳ томонидан юборилган бир ёрдамчи (фаришта) сен билан бирга бўлур.

Демак, силаи раҳм яхшиликка яхшилик билан, борди-келдига борди-келди билан жавоб қайтаришгина эмас, балки ёмонлик, жафо кўрилса ҳам қариндошларга яхшилик қилиш, эътиборсизлик қилаётган қариндошга ҳам эътибор ва таважжуҳ билан бўлар экан.

Хулоса ўрнида айтиш мумкинки, силаи раҳм мусулмон кишига фарз бўлган амалдир. Агар ҳар биримиз силаи раҳмга амал қилиб, қариндош-уруғларимизнинг ҳолидан хабардор бўлсак, жамиятдаги жуда кўплаб муаммолар барҳам топади. Акс ҳолда, бу дунёда ҳам, охирада ҳам кўп қийинчиликларга дуч келиниши мумкин. Ушбу муборак ва файзли кунларда ана шундай хайрли ишларга пешқадам бўлишни Аллоҳ насиб қилсин!

Қилмиш-қидирмиш

ФИРИБГАР ҚЎЛГА ТУШДИ

Ўзбекистон Республикасининг Жиноят кодекси 34-моддасига кўра, илгари ҳукм қилинган жиноятга ўхшаш жиноят содир этган, ушбу кодексда алоҳида кўрсатилган ҳолларда эса махсус қисмининг бошқа моддалари билан ҳам ҳукм қилинган шахснинг қасддан янги жиноят содир этиши хавфли рецидив жиноят деб топилади. Бир неча маротаба судланса-да, такрор жиноятлар содир этган Ш.Шокиров суд ҳукми билан хавфли рецидивист деб топилган шахслардан бири.



"Ўрганган кўнгил ўртанса қўймас" деганларидек, ўзгани алдаш ва ишончини суиистеъмол қилиш йўли билан унинг мулкани қўлга киритиш мақсадида 2022 йил 17 июль кунини "овга чиққан" Ш.Шокиров Фарғона шаҳар, Паҳлавон Маҳмуд кўчасида жойлашган "Малина" номли кафе олдида фуқаро Ҳасанбой Абдуқаҳҳоровни учратиб қолади. У "қора бозор"да ўзига тегишли бўлган пулларни АҚШ долларига алмаштирмоқчи бўлиб турганди. Бундан хабар топган "халис хизматчи" Ҳасанбойнинг ишончига кириб, унинг 5.475.000 сўм миқдоридagi пулларини олиб, гўёки санаб чиққандай бўлади. Сўнгра 500 АҚШ доллари олиб келиб беришини, унганча "омонат"ни ўзида сақлаб туришини айтиб, пулларни қайтариб бераётган вақтда 2.185.000 сўмини фирибгарлик йўли билан қўлга киритгани ҳолда, жуфтакни ростлайди.

Текин луқмадан ҳузурланган Ш.Шокиров орадан беш кун ўтиб, жиноий хатти-ҳаракатини давом эттирди. Бу сафар худди ўша паққада фуқаро

Абдужалил Қўчқоров унинг қармоғига илинди. Устаси фаранг жабрланувчининг 300 АҚШ долларини 3.330.000 сўм миқдоридagi миллий валютага айирбошлаш жараёнида шу маблағдан 700.000 сўмини шундай ўмариб олдики, буни Абдужалил пайқамай қолди. Унинг эътиборсизлигидан фойдаланган Ш.Шокиров зумда номаълум томонга ғойиб бўлди. Олинган хабарга асосан, ҳуқуқ-тартибот ходимларининг тезкор хатти-ҳаракатлари ва суриштирувлари натижасида фирибгар қўлга олинди.

Жиноят ишлари бўйича Фарғона шаҳар судининг ҳукми билан Ўзбекистон Республикасининг Жиноят кодекси 168-моддаси 3-қисми "б" бандида кўрсатилган жиноятни қасддан содир этган Ш.Шокировга нисбатан 5 йил муддатга озодликдан маҳрум қилиш жазоси тайинланди.

Рўзибой МАМАЗИЁЕВ,
Фарғона шаҳар Ички
ишлар органлари боғлиятини
мувофиқлаштириш бошқармаси
терговчиси.

Жаҳон чемпионати Индонезияда ўтказилмайди

Жорий йилнинг 20 май - 11 июнь кунлари Индонезиянинг 6 та стадионида футбол бўйича U - 20 Жаҳон чемпионати ўтказилиши керак эди. Аммо, мазкур мусобақада Исроил терма жамоаси қатнашиши билан боғлиқ норозиликлар сабабли Халқаро футбол ассоциацияси (ФИФА) ушбу мусобақанинг Индонезияда ўтказилишини бекор қилди.

Вазиятнинг бундай ечимга келиши оқибатида 24 жамоа иштирокидаги

жаҳон чемпионатида қуръа ташлаш маросими кечиктирилди. Бироқ, 52 ўйиндан иборат чемпионатнинг ўтказилиш муддати ўзгаришсиз қолиши, яқин кунларда ушбу жаҳон чемпионатини қабул қиладиган давлат номи эълон қилиниши ФИФА мутасаддилари томонидан билдириб ўтилди, дейилади ФИФА ахборотида.

Т.РЎЗИЕВ,
ЎЗА.

ЭЪЛОНЛАР

ФАРҒОНА ВИЛОЯТ "ИССИҚЛИК МАНБАИ" ИЧДБ

Фарғона шаҳридаги қозонхоналарида мавжуд бўлган қозонлар, қозонхона биналари, насос-двигателлар, иссиқлик тармоқларини жорий таъмирлаш ва иссиқлик қопламалари билан ўраш ишлари амалга оширилиши муносабати билан

ТЕНДЕР ЭЪЛОН ҚИЛАДИ.

Мурожаат учун телефон: 91 653-59-34.

Фарғона вилояти, Олтиариқ тумани, "Файрат" маҳалла фуқаролар йиғинида жойлашган "Янги Хористон Ваҳоб" фермер хўжалиги номига берилган думалоқ муҳр йўқолганлиги сабабли

БЕКОР ҚИЛИНАДИ.

"Капитал суғурта" АЖ Фарғона вилоят филиалига қарашли KS 289599, KSL 214395 рақамли суғурта полислари йўқолганлиги сабабли

БЕКОР ҚИЛИНАДИ.

ТАРИХГА
НАЗАРТУРКИСТОН
МУХТОРИЯТИ

қандай ўрнатилган эди?

Мухторият эълон қилинган кундан бошлаб омма ўртасида ўзининг сиёсий фаолиятини авж олди. Мухторият ўзбек, рус ва қозоқ тилларида газеталар чиқара бошлади. Туркистон мухториятининг ташкил этилганлиги тўғрисидаги хабар тезда бутун ўлка меҳнаткашлар оммаси ўртасида кенг тарқалди ва катта қизиқиш уйғотди. Турли шаҳарлар ва туманларда Туркистон мухторияти баланд ва кўтаринки руҳ, шоду хуррамлик билан кутиб олинди, мухториятни қўллаб-қувватлаб, жойларда кўп минг кишилик митинг ва намойишлар уюштирилди.

(Давоми. Бошланиши ўтган сонда).

Туркистон ўлкаси халқларининг мухторият учун кураши тарихида, айниқса, 1917 йил 13 декабрда Тошкент шаҳрида содир этилган қонли фожиалар аянчли ва даҳшатли из қолдирди. Мустамлакачи шўролар ҳукуматининг асл жаллодлик ва қонхўрлик қиёфаси очиб ташланди. Чунки худди шу кун Тошкент шаҳар шўросининг буйруғи билан қизил гвардиячи аскарлар мухторият талаб қилиб чиққан Тошкент шаҳар муслмон аҳолисини беаёв қирғин қилди.

Худди шу кунларда Тошкент шаҳар шўросига Эски шаҳар аҳолисидан митинг ва намойиш ўтказишни сўраб ариза берилди. Тошкент шаҳар шўроси аризани ижобий ҳал қилади ва Эски шаҳарда митинг ва намойиш ўтказилишига рухсат берилди. Аммо янги шаҳарда бундай тadbирларга ижозат этилмади.

Турли сиёсий ва ижтимоий ташкилотларнинг вакиллари митингга сўзга чиқиб, меҳнаткаш омманинг мухторият учун курашга чақирдилар, улар ўзларини халқ комиссарлари атаб, халқ, миллат манфаатига қарши бўлган большевойларни кескин танқид қилдилар. Қора кучлар ҳар доим оммавий халқ ҳаракати уюшган мазмун касб этиб, ривожланиб бораётган пайтда уни барбод қилиш ва пайини қирқиш мақсадида айғоқчиларни ишга соладилар, ғаламислик каби ишларни амалга оширадилар. Бу сафар ҳам худди шундай бўлди.

Шайхонтоҳур масжиди майдонида митинг қизиб турган пайтда бир гуруҳ айғоқчилар шумлик ниятида тўпланганларга қамоқхонага бориб собиқ муваққат ҳукумат аъзоларидан комиссар Г.Доррер ва бошқаларни тезлик билан озод қилиш ва сўнгра ҳокимиятни қўлга олиш керак, деган таклифни илгари сурди. Қони қайнаб турган бир гуруҳ митинг қатнашчиларига бу чақириқ ўз таъсирини кўрсатди. Улар дарҳол умумий оммадан ажралиб, янги шаҳарга – қамоқхона томон юрдилар. Ана шу тарихи айғоқчиларнинг ифвогарлик ҳаракати тўғрисида умумхалқ ягона оммавий митинги иккига бўлиниб кетди ва кучсизланди.

Уюшган, онгли ва мақсадли кураш усули ўрнига оломон кураши стихияли бошбошдоқлик йўлига ўтилди. Бундай кураш усули большевойлар бош бўлган Тошкент шўролар ҳукуматига қўл келар эди. Улар бу ифвогарлик ва бошбошдоқлик ҳаракатини баҳона қилиб, ундан ўзларининг разил мақсадларида

фойдаландилар.

Янги шаҳар томон борган намойишчилар гуруҳи шаҳар соқчилари бошлиғи Гуровични гаровга олдилар. Сўнгра қамоқхона томон юриб, Муваққат ҳукумат аъзоларини озод этишни талаб қилдилар. Қамоқхонадан Доррер ва Иванов озод этилди. Намойишчилар уларни автомобилга ўтқазиб, Кауфман боғи (ҳозирги Амир Темур хиёбони) томон юрдилар. Қизил гвардиячилар машинани тўхтатмоқчи бўлганларида яна ифвогарлик билан оломон ичидан ўқ отила бошлади. Бу аскарларга жавоб ўти очишга баҳона бўлиб, милтиқ ва пулемётлардан намойишчилар устига дўлдек ўқ ёғдирилди. Ана шу тўс-тўполонда Эски шаҳарлик муслмонлардан 16 киши қўрбон бўлди. Большевойлар Доррер ва Ивановни қўлга олиб отиб ташладилар. Мазкур фожа муносабати билан Туркистон мухторияти раҳбарияти халққа қарата мурожаат билан чиқди.

Унда бундай дейилган эди: “Биз Халқ мажлиси ва Туркистон мухторияти Муваққат ҳукуматининг аъзолари чин юракдан таассуф билдирамиз ва туркистонлик муслмонларнинг эзгу хис-туйғуларини ҳақоратловчи бу воқеаларга қарши чиқамиз. Ана шу муносабат билан бизлар мамлакатда тартиб ва осойишталик ўрнатилиши учун зарурий чоралар кўрилиши йўлида барча кучларимизни ишга соламиз. Ҳозирча эса Туркистон халқидан собитлик ва хотиржамлик кўрсатишларини сўраймиз. Бу энг оғир кунларда муслмонларнинг тинчликни сақлаб қолишлари ниҳоятда зарурдир”.

Қонли фожа содир этилган заҳотиёқ Тошкентдан Петроградга Халқ комиссарлари шўросига қуйидаги мазмунда телеграмма жўнатилади: “Қўқонда реакция буржуазия томонидан тайёрланган муслмонлар курултойи Туркистон мухториятини эълон қилди, энди вужудга келган мухторият ҳукумати Туркистон пролетар оммаси томонидан тан олингани ҳолда, бор кучи билан ўлканинг айрим шаҳарларида мухториятни эълон қилишга тайёрланмоқда. Шу йил 13 декабрда Мухаммад пайғамбар (алайҳиссалом) туғилган кунда Тошкентда мухторият эълон қилинди”. Мазкур телеграммага жавобан Петрограддан “Жойларда ҳокимият сиз, ўзингиз, демак, сиз ўзингиз буйруқларни ишлаб чиқинг” деган мазмунда телеграмма Тошкентга жўнатилади.

Ана шундан сўнг, Туркистон Халқ комиссарлар шўроси мухторият масаласида махсус қарор қабул қилди. Унда, жумладан, бундай дейилган: “Туркистон Таъсис курултойи чақирилади. Фақат унинг ўзигина Туркистон ўлкаси мухториятини эълон қилишга ҳақлидир”. Бизнингча, бу қарор ортиқча изоҳга муҳтож эмас. Большевойлар Туркистон муслмонларининг фавқуллода чақирилган IV курултойи томонидан эълон қилинган Туркистон мухториятини тан олмадилар. Улар Туркистон ўлкаси Таъсис мажлисини ўз ташаббуслари билан чақириб, ўзларига маъқул ва ўзларига ёқадиган мухториятни келажакда ташкил этишни режалаштирган эдилар. Оқибатда шундай бўлди ҳам.

Февраль буржуа-демократик инқилобидан сўнг Туркистонда қарор топган муваққат ҳукуматнинг Туркистон қўмитаси, кадетлар, эсерлар ва меньшевиклар партияларининг вакиллари Туркистон ўлкаси халқларига мухторият ҳуқуқи берилиши тарафдори бўлган. Аммо, афсусланадиган жойи шундаки, Туркистон мухторияти масаласида туб ерли муслмон халқларнинг истиқлолчилик ҳаракати фидойилари сафларида муваффақият ва ютуқнинг энг зарур шарти – ўзаро бирлик, ҳамдардлик ва ҳамкорлик бўлмади...

Элмурод ЗОКИРОВ,
Шоҳистахон
ЎЛЖАЕВА.

МУАССИС:
«Farg'ona haqiqati» va
«Ferganskaya pravda»
gazetalari tahririyati

Бош муҳаррир:
Рустам ОРИПОВ.

2021 йил 18 августда Ўзбекистон Республикаси Президенти Администрацияси ҳузуридаги Ахборот ва оммавий коммуникациялар агентлиги Фарғона вилояти ҳудудий бошқармасида 12-001 рақами билан рўйхатдан ўтган.

Газета “Полиграф-пресс” МЧЖ босмахонасида таҳририятнинг оригинал макети асосида офсет усулида А-3 формат (8 саҳифа)да 2130 нусxada чоп этилди.
Буортма №: 208. Босмахона манзили: Фарғона вилояти, Маргилон шаҳри,
Туркистон кўчаси, 236-«б» уй.

Бизнинг манзил:
150114, Фарғона шаҳар, Сохибқирон Темур
кўчаси, 28-уй.

Бош муҳаррир қабулхонаси: (факс) 73 226-02-70.
Реклама ва эълонлар: 73 226-71-24.

Саҳифаловчи: Достонбек Холматов.
Босишга топшириш вақти: 18.00.
Топширилди: 16.00.

ISSN: 2010-8370



91772010837006